



曾文正公大事記卷上

合肥李鴻章

審定

湘鄉曾國荃

瀏陽縣第三區村公所

東湖王定安著

太傅曾文正公諱國藩字滌生

原名子誠字伯涵

先世居楚之衡陽

國初有名孟學者始遷

湘鄉之大界里遂為湘鄉人孟學字元吉元吉之仲子曰輔臣者公之高祖也輔臣生

竟希誥贈光祿大夫妣彭氏誥贈一品夫人竟希生玉屏字星岡是為公王父初

封中憲大夫累

贈光祿大夫妣王氏初

封恭人累

贈一品夫人曾氏自明以

來世業農積善孝友而不顯於世星岡公少時喜任俠已乃折節下士嘗曰吾少耽遊

惰往還湘潭市肆與裘馬少年相逐或曰高酣寢長老有譏以浮薄將覆其家者余聞

而立起自責貨馬徒行自是終身未明而起余年三十五始講求農事居枕高嶺山下

壟峻如梯田小如瓦吾鑿石決壤開十數畝而通為一然後耕夫易於從事吾昕宵行

水聽蟲鳥鳴聲以知節候觀露上禾顛以為樂種蔬半畦晨而耘吾任之夕而糞傭保

任之入而臥豕出而養魚彼此雜職之凡菜茹手植而手擷者其味彌甘凡物親歷艱

苦而得者食之彌安也吾宗自元明居衡陽之廟山久無詞宇吾謀之宗族諸老建立

祠堂歲以十月致祭自國初遷居湘鄉至吾曾祖元吉公基業始宏吾又謀之宗族

別立祀典。歲以三月致祭。世人禮神。徼福求諸幽遐。吾以為神之陟降。莫親於祖考。故獨隆於生我一本之祀。而他祀姑闕焉。後世雖貧。禮不可墮。子孫雖愚。家祭不可簡也。吾早歲失學。壯而引為深恥。既令子姪出就名師。又好賓接文士。候望音塵。常願通材宿儒。接跡吾門。此心乃快。其次老成端士。敬禮不怠。其下汎應羣倫。至於巫醫僧徒。增輿星命之流。吾屏斥之。惟恐不遠。舊姻窮乏。遇之惟恐不隆。識者觀一門賓客之雅正。疏數而卜家之興敗。理無爽者。鄉黨戚好。吉則賀。喪則弔。有疾則問。人道之常也。吾必踐焉。必躬焉。財不足以及物。吾以力助焉。鄰里訟爭。吾常居間以解。兩家之紛。其尤無狀者。厲辭詰責。勢若霆摧。而理如的破。悍夫往往神沮。或具尊酒通殷勤。一笑散去。君子居下。則排一方之難。在上。則息萬物之驚。其道一耳。津梁道途。廢壞不治者。孤嫠衰疾無告者。量吾力之所能。隨時圖之。不無小補。若必待富而後謀。則天下終無成卒。事矣。星岡公生三子。長曰竹亭。諱麟書。累封光祿大夫。公之父也。仲曰上臺。早之季曰驥雲。以公貴。竹亭封翁。生子五人。公居長。次國漢。字澄侯。次國華。字溫甫。次國荃。字沅浦。次國葆。字事恒。封翁積苦力學。久困於學政之試。徒步素筆。以干有司。年四十三。始補縣學生員。事星岡公以孝聞。星岡公生平督子最嚴。往往稠人廣眾。壯聲呵斥。或有不快於他人。亦痛繩其子。竟日嗃嗃。詰數愆尤。封翁屏氣負牆。蹢躅徐進。愉色如初。星

岡公晚年。病痿痺。動止不良。又瘖不能言。即其所需。以頤使。以目求。即有苦。感額而已。封翁朝夕奉事。常先意而得之。夜侍寢處。星岡公雅不欲煩煩驚。召而他僕。殊不稱意。而前後浚益數。一夕六七起。封翁時其將起。則進器承之。少間又如之。聽於無聲。不失分寸。嚴寒大溲。則令他人啟移手足。而身翼護之。或微沾汗。輒滌除。易中衣。拂動甚微。終宵惕息。明旦則驥雲入侍。奉事一如封翁之法。久而諸孫孫婦。內外長幼。感化訓習。爭取垢汙襦袴浣濯為樂。不知其有臭穢。或挽篋輿游戲庭中。各有常程。病凡三載。封翁未嘗一日安枕也。妣江太夫人。同邑江沛霖女。事舅姑四十餘年。饒饒必躬。在視必恪。賓祭之儀。百方檢飭。尺布寸縷。皆一手拮据。江太夫人以嘉慶辛未年十月十一日亥時。誕公於白陽坪里第。是時竟希公年七十矣。忽夢有巨物蜿蜒自空而下。首屬於梁。尾蟠於柱。鱗甲森然。不敢逼視。竟希公驚寤。已而公生。年十六。應郡縣試。旋取脩生。

道光十三年。學使岳鎮南按臨。補縣學生員。明年甲午科鄉試。中式第三十六名。舉人。時年二十四。座主為徐雲瑞。許乃安。房師為張啟庚。

道光十八年。戊戌科會試。中式第三十八名。貢士。座主為穆彰阿。朱士彥。吳文鎔。廖鴻荃。房師為李芝昌。正大光明殿覆試一等。殿試三甲第四十二名。賜同進士出。

身。朝考進呈。擬一等第三名。宣宗拔置第二名。改翰林院庶吉士。庚子散館。二等第十九名。授檢討。旋派順天鄉試磨勘。

道光二十一年十月。充國史館協修官。

道光二十三年三月。大考翰詹。列二等第一名。奉旨以翰林院侍講升用。六月。詔以公為四川正考官。趙楫副之。七月。補翰林院侍講。十一月。回京。充文淵閣校理。道光二十四年二月。侍班於文淵閣。觀經筵大典。五月。召見於勤政殿。充翰林院教習庶吉士。十二月。轉補翰林院侍讀。

道光二十五年。乙巳科會試。充第十八房同考官。五月。升授詹事府右春坊右庶子。九月。擢翰林院侍講學士。謝恩。召見。十二月。補日講起居注官。充文淵閣直閣事。道光二十七年。大考翰詹。列二等。奉旨記名。遇缺題奏。賞大卷緞二件。六月。升授內閣學士兼禮部侍郎銜。謝恩。召見於勤政殿。充考試漢教習閱卷大臣。七月。公弟國荃補縣學生員。十月。充武會試正總裁。又派殿試讀卷大臣。

道光二十八年七月。公弟國荃補廩膳生。九月。充稽察中書科事務。

道光二十九年正月。詔授禮部右侍郎。謝恩。召見。上嘉勉焉。三月十四日。值班。召見。三十日。又召見。每有奏對。上輒嘉賞。八月。兼署兵部右侍郎。充宗室舉

人覆試閱卷大臣。九月。充順天鄉試覆試閱卷大臣。十月。充順天武鄉試校射大臣。道光三十年正月十四日。宣宗成皇帝升遐。文宗嗣位。詔以郊配廟祔大禮。公

具疏條陳。

上嘉納之。二月。內賜

遺念衣一件。玉珮一事。

三月。應

詔陳言。奉

旨。

獎許。舉行日講事宜。四月。充庚戌科會試覆試閱卷大臣。又派

朝考閱卷大臣。五月。

禮部考試優貢。六月。兼署工部右侍郎。充

朝考拔貢閱卷大臣。七月。公弟國葆補縣學

生員。八月。

召見。詢以工部職務。奏對稱

旨。充考試國子監學正學錄閱卷大臣。九

月。充宣宗梓宮前恭捧

冊寶大臣。禮畢。加二級。十月。兼署兵部左侍郎。

咸豐元年三月。疏陳簡練軍實。以裕

國用。

召見嘉勉。四月。上敬陳

聖德一疏。語

多切直。朝士皆憂其獲譴。及

優詔褒答。一時稱盛事焉。五月。兼署刑部左侍郎。八月。

充順天鄉試搜檢大臣。十月。充順天武鄉試正考官。沈兆霖副之。試竣覆命。召見。十

一月。監視

郊壇開工。十二月。上備陳民間疾苦一疏。奉

旨。敕部議奏。監視

墓陵

隧道開工。

咸豐二年正月。兼署吏部左侍郎。二月。隨扈祇謁

墓陵。三月。疏請寬免勝保處分。以

廣言路。

上嘉納之。充壬子科會試搜檢大臣。又派恭送

太廟冊寶大臣。四月。以

宣宗升配。恩加一級。六月。

詔以公為江西正考官。謝

恩。附奏試竣回籍。硃批。允。

之七月。行次安徽太湖縣。聞母江太夫人之訃。匍匐奔喪。八月。抵家。九月。葬江太夫人。時粵匪洪秀全等。由廣西竄長沙。圍攻三閩月。不克。十月。解圍去。掠船浮洞庭湖而下。陷岳州。十一月。陷漢陽。十二月。陷武昌。省城巡撫常大浩等死之。大江南北土匪蜂起。詔諭湖南巡撫張亮基曰。丁優侍郎曾國藩。籍隸湘鄉。於湖南地方人情。自必熟悉。著該撫傳旨。令其幫同辦理本省團練。搜查土匪事宜。伊必盡心。不負委任。欽此。公以奉諱歸家。不宜與聞軍事。草疏懇請終制。方發使就道。適庶吉士郭嵩燾至。力勸公出。公弟國荃亦贊之。於是始治兵於長沙。命羅澤南王鑫等領湘勇三營。仿戚繼光束伍成法。逐日操練。是為湘軍創立之始。

咸豐三年正月。編查保甲。設發省局。一時巨姦大慝。多被誅戮。盜賊屏息。莠民多改而從善。遠近大勸。遣長佑李輔朝王鑫。搜勦常甯耒陽土匪。賊聞風驚潰。遣羅澤南討衡山土匪。破平之。奉上諭。封疆大吏。翦除首惡。即可保衛善良。著該署督撫等。會同在籍侍郎曾國藩。體察情形。應如何設法團練。以資保衛之處。悉心妥籌辦理。欽此。粵匪洪秀全棄武昌。剽掠東下。男婦數十萬人。舳舻蔽江。疊陷沿江郡縣。十七日。陷安慶省城。二月初十日。陷金陵。據為偽都。將軍祥厚。總督陸建瀛等死之。欽差大臣向榮。追師駐金陵城外。號江南大營。詔授江忠源為湖北按察使。飭赴江南大營。幫辦軍

務會湖北崇通兩邑土匪大起。公遣軍與忠源會剿平之。忠源遂率師而東。三月。詔以駱秉章署理湖南巡撫。時永桂以上會匪充斥。亂者紛起。每警報至。公酌量緩急。分營往捕。議定即傳檄促行。遣左右料簡軍裝火藥。軍行無踰兩日者。所至捕斬首惡。搜查餘黨。數日而定。鄉里宴然。四月。江忠源師次九江。值安慶再陷。賊船上犯湖口。忠源偵知賊所向。即日間道馳赴南昌。部署略定而賊至。忠源告急於湖南。公檄江忠源由瀏陽赴江西。朱孫詒羅澤南等由醴陵繼進。另派鎮筸兵千人。令夏廷樾總統之。會朱孫詒有違言。湘勇無統帥。郭嵩燾說孫詒率所部以行。嵩燾因亦隨行。是為湘軍出境剿賊之始。六月。公疏薦參將塔齊布。千總諸殿元。請破格超擢。奉 旨塔齊布賞副將銜。諸殿元以守備用。七月。湘軍抵南昌。南昌城外賊壘。惟文孝廟數座。官軍屢攻不能克。日有死傷。郭嵩燾偶獲賊謀。訊之。則賊皆舟居文孝廟。賊壘環三面築牆而虛其後。專以翼蔽賊舟而已。嵩燾因獻議曰。東南各行省州縣多阻水江湖。一日遇風可數百里。賊舟瞬息可達。官兵率由陸路躡之。其勢常不及。長江數千里之險。遂獨為賊所有。且賊上犯以舟楫。而官軍以營壘禦之。求與一戰而不可得。宜賊勢之日猖也。忠源大韙之。即日具疏請飭湖南湖北四川仿照廣東拖罟船式。各造戰艦數十。飭廣東製備炮位。以供戰艦之用。並交曾國藩管帶部署。奉 旨允行。長江水師之議自此始。八月。公

疏稱衡永彬桂匪徒聚集之數數月以來巨案迭出即日移駐衡州就近調度蓋提督鮑起豹與公時相齟齬營兵與湘勇斷斷不和至有械鬪之案衡州之行所以避之也公既至衡州衡陽廩生彭玉麟故有名公一見器之又調湘陰外委楊載福至並令幫辦弟國葆營務國葆力薦彭楊之才當任一軍不宜屈為幫辦公方謀治水師乃徵二人各募水勇領一營彭楊受命治水師自此始南昌解嚴賊陷九江府分股竄湖北署湖廣總督張亮基潰於田家鎮江忠源聞道馳援戰不利北屯廣濟賊逆趨武昌詔以吳文鎔為湖廣總督文鎔公座師也聞警急馳赴鄂而賊已陷黃州漢陽北擾德安南及興國岳州戒嚴公與湘撫駱秉章籌辦防堵檄調援江西諸軍回湘奉上諭長江上游武昌最為扼要若稍有疏虞則全楚震動著駱秉章曾國藩選派兵勇並酌撥炮船派委得力鎮將馳赴下游與吳文鎔等會合剿辦力遏賊鋒毋稍延誤欽此十月奉上諭曾國藩團練鄉勇甚為得力剿平土匪業經著有成效著酌帶練勇馳赴湖北所需軍餉等項著駱秉章籌撥供支兩湖唇齒相依自應不分畛域一體統籌也欽此吳文鎔屢請援師朝廷以武昌萬分危急趣公督帶兵勇船炮馳赴下游會剿以為武昌策應公疏稱武昌聞已解嚴臣暫緩赴鄂又言該匪以舟楫為巢穴欲加攻剿必以戰船為第一務臣擬在衡州試辦俟有頭緒即請親自督帶馳赴下游奉硃批所

慮甚是。汝能斟酌緩急甚屬可嘉。欽此。江忠源疏請飭公以所練六千人出省剿賊。奉上諭。湖北情形緊要。已有旨令江忠源暫留剿賊。著曾國藩帶楚勇六千人。酌酌炮械。籌僱船隻。駛出洞庭湖。由大江迎頭截剿。肅清江面賊船。欽此。江忠源回軍漢陽。詔授忠源為安徽巡撫。並諭楚皖一體斟酌緩急。相機進剿。時安慶已為賊踞。議建廬州為省會。忠源受命。力疾北趨廬州。十一月奉 上諭。宋晉奏。曾國藩鄉望素孚。人樂為用。請飭挑選練勇。僱覓船隻。順流東下。與江忠源水陸夾擊等語。現在安徽逆匪連陷桐城舒城。逼近廬郡。呂賢基殉難。江忠源患病。皖省情形危急。總由江面無水師攔截進剿。任令賊蹤往來自如。該侍郎前奏亦曾慮及。著即趕辦船隻炮位。并前募勇六千。由洞庭湖駛入大江。與江忠源水陸夾擊。該侍郎忠誠素著。兼有膽識。朕所素知。必能統籌全局。不負委任也。欽此。公疏稱籌備水陸各軍。赴援安徽。而船炮未齊。須俟購買夷礮廣礮千尊。解到乃可成行。又請設立水路糧臺。奉 硃批。現在安省待援甚急。若必偏執己見。則太覺遲緩。朕知汝尚能激發天良。故特命汝赴援。以濟燃眉。今觀汝奏。直以數省軍務。一身克當。試問汝之才力。能乎否乎。平時漫自矜詡。以為無出己之右者。及至臨陣。果能盡符其言甚好。若稍涉張皇。豈不貽笑於天下。著設法趕緊赴援。能早一步。即得一步之益。汝能自擔重任。迥非畏葸者比。言既出諸汝口。必需盡

如所言。辦與朕看。欽此。公疏稱餉乏兵單。成效不敢必。與其將來毫無功效。受大言欺君之罪。不如此時據實陳明。受畏蕙不前之罪。奉 硃批。成敗利鈍。固不可逆觀。然汝之心。可質天日。非獨朕知。若甘受畏蕙之罪。殊屬非是。欽此。常甯土匪攻陷縣城。連陷嘉禾藍山二縣。遣弟國葆及儲玖躬等討平之。十二月。疏稱衡永郴桂尚有會匪餘黨。實為湖南鉅患。亦是臣經手未完之件。奉 硃批。汝以在籍人員。能如是出力。已屬可嘉。著知會撫臣剿辦。或有汝素來深信之紳士。酌量辦理。亦可。欽此。賊陷廬州。巡撫江忠源死之。

咸豐四年正月。湖廣總督吳文鎔戰歿於黃州。武昌戒嚴。奉 上諭。此時惟曾國藩統帶礮船兵勇。迅速順流而下。直抵武昌。可以扼賊之吭。此舉關係南北大局。甚為緊要。該侍郎應能深悉緩急情形。兼程赴援。欽此。初公在衡州。創立水師。前無成法。每遇廣東員弁。及長年三老。能行船者。周咨博采。屢更其制。後乃稍仿廣東拖罟快蟹。長龍之式。增置檣座。命守備成日標監督之。另檄廣西之同知褚汝航夏鑒等。分設一廠於湘潭。既成軍。邀長沙黃冕觀之。冕獻言曰。吾出入兵間十餘年。所見軍容整齊。無及此者。然長江千里。港汊紛歧。賊船易於藏匿。江南小戰船。曰舢板者。每營請添十號。以備搜剿。港汊之用。公大韙之。即日改定營制。每營置快蟹一。營官領之。長龍十。曰正哨。舢板

十。曰副哨。快蟹。槳工二十八人。榜八人。長龍。槳工十六人。榜四人。舢板。槳工十人。每船另置礮手三人。槍長一人。頭工二人。舵工一人。副舵二人。水師之制。於是大備。公既聞江忠源。吳文鎔。相繼殉節。乃經營東征。募水師五千人。以褚汝航為總統。成名。標諸殿元。楊載福。彭玉麟。鄒漢章。龍獻琛等。分領之。又募陸師五千人。以塔齊布為先鋒。而周鳳山。儲致躬。林源恩。鄒世琦。鄒壽璋。楊名聲。及弟國葆等。分領之。始設立八所。曰文案所。曰內銀錢所。曰外銀錢所。曰軍械所。曰火器所。曰偵探所。曰發審所。曰採編所。皆委員司之。齎米煤鹽油。及軍火器械。載民船百數十號。以行。員弁勇夫。共一萬七千餘人。軍容於斯為盛。二月。賊陷岳州府。自湘陰趨靖港。陷甯鄉。駱秉章遣王鑫。敗賊於喬口。公舟師次長沙。遣弟國葆及儲致躬。趙煥聯等。分途攻剿。致躬破賊於甯鄉。追北陣亡。賊大奔潰。遣舟師追擊走之。時貴州候補道胡林翼。應前總督吳文鎔之調。帶練勇六百名。由黔赴鄂。行次金口。聞文鎔已歿。賊舟上犯。阻隔不能進。公急調之回湘。咨商駱秉章。支給餉糈。胡林翼以一軍從公。剿賊自此始。奉上諭。據青麟奏稱。探聞曾國藩帶勇。已距金口百有餘里。貴州道員胡林翼隨同前來。現復退往上游。賊船颺忽上竄。急須出其不意。順流轟擊。該侍郎礮船。早入楚北。胡林翼何以退守金口。著曾國藩飭知該道。迅速前進。毋稍遲延。欽此。公疏陳胡林翼未能赴鄂之由。且稱林翼之才。勝臣十

倍將來可倚以辦賊。旋檄林翼剿崇陽通城土匪。又令塔齊布往助之。官軍既克湘陰。賊之在鄂州者。全數遁去。三月。公至岳州。搜捕西湖餘匪。巡撫駱秉章疏請留公暫緩赴鄂。硃批。楚南之賊。明係分竄。現在湖北尚有多賊。曾國藩礮船原為肅清江面。第此時道路不通。暫可留在湖南剿辦。亦不能專待事竣。緩緩北上。楚南辦有頭緒。仍應逆赴湖北。為是。曾國藩素明大義。諒不至專顧桑梓。置全局於不問。北重於南。皖鄂重於楚南。此不易之局也。欽此。又奉寄喻。此時得力舟師。專恃曾國藩水師一軍。倘涉遲滯。致令漢陽大股竄據武昌。則江路更形阻隔。朕既以剿賊重任畀之。曾國藩一切軍情。不為遙制。欽此。先是。公派陸軍由崇通剿賊。冀以次掃蕩。進援武昌。而自統水師順流而下。既至岳州。遭風撞損礮船。而王鑫之軍抵羊樓司者。遇賊潰回。賊乘勝上犯。公弟國葆及鄒壽璋楊名聲等營皆潰。退入城。賊攻城甚急。公檄舟師登岸擊賊。拔出城中軍民。退保長沙。因上疏自劾。奉諭。曾國藩奏水陸各軍接仗情形。並自請治罪一摺。此次岳州水軍雖獲小勝。惟因陸路水利。以致賊匪復行上竄。曾國藩統領水陸諸軍。調度無方。實難辭咎。著交部嚴加議處。仍著督帶水師船迅速進剿。克復岳州。即行赴援武昌。毋得再有遲誤。欽此。又奉諭。曾國藩所統各勇為數過多。既須剿辦粵匪。又須搜捕土匪。即如所奏有撥赴平江通城者。有撥赴臨湘蒲圻者。又有不能依

限前進者。散布各處。照料既不能周。剿捕自難得力。一有敗衄。人無固志。似此何能力圖進取。此時肅清江面。專恃此軍。曾國藩初次接仗。即有挫失。且戰船被風沈損多隻。何事機不順若此。現在湖北待援孔亟。曾國藩以在籍紳士。專顧湖南。不為通籌大局之計。平日所以自許者何在。欽此。先是公在衡州。奏請原任湖北巡撫楊健入祀鄉賢。部議革職。至是奉旨改為降二級調用。胡林翼敗賊於上塔市。塔齊布敗賊於河坪。公因長沙戒嚴。檄胡林翼塔齊布回湘助防。賊據靖港。分股由甯鄉隔湘潭。遂於湘水上游掠民船數百。豎立木城以阻援師。二十八日。塔齊布率師赴援。大捷於湘潭。斬賊數千級。四月初一日。公遣楊載福等率水師助剿。復會陸軍大破之。初二日。公親督師邀擊賊於靖港。西南風發。水勢迅急。為賊所乘。公自投於水。左右救之。獲免。而是日水師之在湘潭者。復大捷。初三日。水師焚賊船淨盡。塔齊布諸軍復獲大勝。初五日。克湘潭縣。自粵逆肇亂以來。此次始受大創。官兵亦稍自奮。人人有殺敵致果之心矣。公回長沙。重整水陸各軍。因言吾水陸萬人。非不多。而遇賊即潰。岳州之敗。水師拒敵者。楊載福一營。湘潭之戰。陸師塔齊布兩營。水師楊載福兩營。用此益知兵貴精不貴多。而引諸葛公祁山之敗。且謀減兵省食。勤求已過。又曰。古人用兵。先明功罪賞罰。今時事艱難。賢人君子。大半潛伏。吾以義聲倡導鄉人。同履危亡之地。諸君之初從我。非以

利動也。故於法亦有所難施。所以兩次致敗。其弊亦由於此。公奏湘潭靖港勝負各情。並上疏自劾。奉 上諭。屯聚靖港逆船。經曾國藩親督舟師進剿。雖小有斬獲。旋以風利水急。戰船被焚。以致兵勇多有潰敗。據曾藩國自請從重治罪。實屬咎有應得。姑念湘潭全勝。水勇甚為出力。著加恩免其治罪。即行革職。仍趕緊督勇剿賊。帶罪自効。湖南提督鮑起豹。自賊竄湖南以來。並未帶兵出省。疊自奏報軍務。僅止列銜會奏。提督督印務。即著塔齊布暫行署理。該部知道。欽此。又奉 上諭。曾國藩統領舟師。屢有挫失。此摺所陳。紕繆各情。朕亦不復過加譴責。現在所存水陸各勇。僅集有四千餘人。若率以東下。誠恐兵力太單。該革員現復添修戰船。換募水勇。據稱一兩月間。當有起色。果能確有把握。亦尚不難轉敗為功。目下楚北賊蹤。由應山竄回德安。隨州之賊。亦回武漢。是武昌待援甚急。該撫等務當督飭水陸各軍。迅將此股敗竄之匪。殲滅淨盡。兼可赴援武昌。以顧大局。欽此。五月。公疏稱。現將水陸各軍。嚴汰另募。重整規模。一俟料理完竣。即星夜遣征。誓滅此賊。以雪挫敗之恥。以贖遲延之罪。奉 上諭。曾國藩添募水陸兵勇。及新造重修戰船。既據奏稱。已可集事。則肅清江面之舉。仍藉此一軍。以資得力。塔齊布膽識俱壯。堪膺剿賊之任。著駱秉章即飭統領弁兵。迅速出境。曾國藩與

該署提督共辦一事。尤應謀定後戰。務期確有把握。萬不可徒事孟浪。再致挫失。欽此。是時湖南郡縣如岳州華容常德龍陽等城多被賊陷。而湖北之賊由宜昌枝江松滋入太平口。與西湖賊合。連陷澧州安鄉等城。兩湖糜爛不堪。湖北巡撫青麟糧盡棄城走長沙。賊入武昌據之。詔誅青麟於荊州。以楊需署湖廣總督。公整軍東下。水師分三起。先遣褚汝航率礮船四營當前。敵陸師亦分三路。以塔齊布為中路。駐新牆。胡林翼等由西路趨常德。江忠淑林源恩等由東路趨崇通。賊聞官軍大至。棄常德澧州。併力守岳州。公檄羅澤南周鳳山等助攻岳州。塔齊布破賊於新牆。水師破賊於南津港。七月初一日。官軍克岳州府。捷聞。奉上諭。覽奏稍慰朕懷。汝能迅速東下。藉此聲威。或可掃除武漢之賊。朕日夜焦盼。憂思彌增。護船陸勇。終恐未可深靠。欽此。又奉。上諭。此次克復岳州。大獲勝仗。湖南逆蹤業就肅清。江路已通。重湖無阻。即著塔齊布曾國藩會督水陸兵勇。乘此聲威。迅速東下。力擣武漢賊巢。以冀蕩平羣醜。欽此。官軍破賊於城陵機。乘勝逐北。值南風大作。師船不能回營。為賊所乘。褚汝航夏鑾陳耀龍何鎮邦諸殿元等前後戰歿。塔齊布破賊於雷鼓臺。擒賊酋曾天養斬之。羅澤南破賊於城陵機。水師燬賊船幾盡。公疏稱岳州四次獲勝情形。奉上諭。塔齊布曾國藩自帶兵以來。既未嘗遇敗而怯。定不致乘勝而驕。總宜於安速之中。持以慎重。則楚省賊蹤。

漸可掃蕩。欽此。七月初三日。塔齊布等率陸軍會李孟羣楊載福等水師。盡平沿江兩岸賊壘。窮追二百餘里。至嘉魚縣境。賊衆悉數東竄。公進駐螺山。捷聞。奉 旨賞給三品頂戴。公疏稱臣墨經從戎。不敢仰邀議敘。嗣後湖南一軍再立功績。無論何項褒榮。概不敢受。奉 硃批知道了。殊不必如此固執。汝能國而忘家。鞠躬盡瘁。正可慰爾亡親之志。盡孝之道。莫大於是。酬庸褒績。國家政令所在。斷不因汝一請。稍有參差。汝之隱衷。朕知之。天下無不知也。欽此。公疏陳道員李孟羣忠勇奮發。思報父讎。該員服猶未闕。請從權統領水師。以專責成。奉 旨報可。楊載福彭玉麟等水師乘勝東下。搜捕沿江汊港。賊船焚燬略盡。遂抵金口。塔齊布陸軍破賊於羊樓司。八月初四日克崇陽縣。又破賊於咸甯。公進駐嘉魚。奉 硃批汝等自湘潭大捷後。屢次得手。有此聲威。豈可自餒。惟利在速戰。莫待兩下相持。師勞餉乏。大有可慮處。塔齊布不致為崇陽一股牽制。方好。欽此。公進駐金口。塔齊布羅澤南破賊於橫溝橋。遂與公師會。適荊州將軍官文選魁玉楊昌泗等軍五千人亦會於金口。因遣魁玉等擊破沌口賊。公集諸將商取武昌之策。羅澤南袖圖進曰。洪山花園兩路皆賊重兵所在。花園瀕江環城。尤賊勢所注。賊壘九座。每壘數千人。長壕鉅障。袤延數里。吾所部不滿三千。以當洪山之賊有餘。以擊花園不足。請與塔將軍分任之。花園洪山賊壘破。武昌無自固之勢。賊將